

大國者下流天下之交

交會也。大國者諸小國之交會如水之下流爲天下衆水之交會也。

天下之牝牡常以靜勝牡以靜爲下。

牝不先動以求牡，牡常先動以求牝。動求者招損，靜俟者受益。故曰以靜勝牡，動求者居上，靜俟者居下。故曰以靜爲下。或曰牝字其一疑衍。

故大國以下小國則取小國，小國以下大國則取大國。或下以取，或下而取。

大國不恃其尊謙降，以下小國則能致小國之樂附，小國甘

道藏輯要

道德真經註

突

心集十

處於卑俯伏以下大國則能得大國之見容，下以取謂大國能下以取小國之附下而取謂小國能下而取大國之容也。大國不過欲兼畜人，小國不過欲入事人，兩者各得其所欲大者宜爲下。

大國下小國者欲兼畜小國而已，小國下大國者欲入事大國而已。兩者皆能下則大小各得其所欲，然小者素在人下不患乎不能下大者，非在人下或恐其不能下，故曰大者宜爲下。章首下流之喻以喻大國非在人下而能下者，牝牡之喻以喻小國素在人下而能下者。

右第五十二章